



# Seachtain na Scoileanna Caitliceacha 2018

## Tráth 4: Teaghlaigh na Lúcháire

### An Bord Bainistíochta

#### Réamhrá

Tugtar faoi deara in imlitreacha (*Lumen Fidei* agus *Laudato Si'*) agus aithisc aspalda An Phápa Proinsias (*Evangelii Gaudium* agus *Amoris Laetitia*) go dtarlaíonn an focal 'lúcháir' 221 uair. Is rud lárnach tábhachtach é an lúcháir a bheith inár saol Críostaí. Is minic go luaitear 'lúcháir' agus 'sult' in éineacht lena chéile, ach ní ionann an dá rud. Tá brí níos doimhne leis an lúcháir. Dearbhaíonn An Pápa Proinsias a leithéid trí chur i gcuimhne dúinn gur bronntanas ó Dhia é. Is fearr é a thuiscint mar dhaingean na fírinne, go mbainimid le híosa agus le clann Dé. Is sainchomhartha na Críostaíochta é an lúcháir, is sinne clann na lúcháire, an mhuintir a mbíonn an lúcháir go smíor ionainn. Tá an lúcháir ar nós ghrásta an Spioraid, líontar ár gcroí is ár n-anamacha leis.

Deir An Pápa Proinsias gurb é comhartha aitheantais an Chríostaí é an lúcháir, lúcháir an tSoiscéil, go dtuigimid gur roghnaigh agus gur shlánaigh Íosa sinn, go ndéanann sé sinne a athnuachan, agus go gcreidimid go bhfuil sé ag feitheamh orainn. Bímis thuas seal, nó thíos seal, bíonn dóchas inár gcroí. Ní féidir an lúcháir dhóchasach seo a choimeád chugainn féin áfach, caithimid scaoileadh leis ar fud an tsaoil.

Deir An Pápa Proinsias gur bua misinéireachta é an lúcháir. Má bhímid i bhfochair Chríost ar an aistear saoil, beidh an lúcháir in Íosa á fhógairt againn, agus is é sin an rud a shlánaíonn an t-aistear dúinn. Tá sé de dhualgas orainne mar bhaill den Bhord féachaint chuige go slánaítear an t-aistear oideachais do gach aon bhall den teaghlach scoile, ar bhealach lán de lúcháir.

Deir An Pápa Proinsias go mbíonn bua na lúcháire acusan atá thar an gcoitiantacht, na daoine a bhíonn an fhís uasal acu, atá beag beann ar mhionchúiseachas ar bith, bíodh sé ag tarlú ar scoil, i measc an phobail, nó san Eaglais. Bíonn ceann sprice ard rompu, agus tiomantas iontu é a bhaint amach ar bhealach lán de lúcháir. Nuair a scaiptear an grásta ceart ar fud na scoile, déantar teaghlach grámhar lúcháireach de na baill, a mbíonn dlúthbhaint acu le grá Dé. An lúcháir a roinntear eatarthu, is é seo lúcháir na hEaglaise chomh maith. Is é seo an chuid dheireanach den tsraith acmhainní a bhain le Seachtain na Scoileanna Caitliceacha 2018, agus ba mhaith an rud é go ndéanfadh na baill de na Boird éagsúla guí chun an Tiarna go líonfaí le grásta na lúcháire sibh, ionas go ndéanfar baill thar an ngnáth daoibh, agus sibh ag súil leis na dualgais atá oraibh a chomhlíonadh go héifeachtach sa todhchá, agus an ceann sprice ard a bhaint amach.



## Machnamh

- An bhfuil bealaí ann ina bhféadfadh an Bord Bainistíochta an oscailteacht a spreagadh i leith na lúcháire Críostaí i measc bhaill an bhoird agus phobal na scoile?
- An bhfuil bealaí ann ina bhféadfadh an Bord Bainistíochta dearcadh feabhsaithe a léiriú maidir le buanna na ndaoine thar an gcoitiantacht a chur i bhfeidhm san obair scoile?
- An bhfuil bealaí ann ina bhféadfadh an Bord Bainistíochta tacaíocht agus spreagadh a bhaint as an lúcháir Chríostaí nuair a chuirtear ábhar dúshlánach rompu?
- Is cuid lárnach de shaol na scoile Caitlicí é lúcháir an ghnáthlá scoile a cheiliúradh mar theaghlach. An bhfuil bealaí ann ina bhféadfadh an Bord Bainistíochta cabhair bhreise a chur ar fáil maidir le lúcháir an ghnáthlá scoile a aithint agus a cheiliúradh? Conas san?

## Paidir

### Urnaí leis an Lúcháir a Cheiliúradh

A Dhia Shíoraí,  
cabhraigh linn lúcháir an aiséirí a cheiliúradh inár saol,  
agus an grá a leanann é.  
Iarraimid é seo ort trí do Mhac, Íosa Críost ár dTiarna,  
a mhaireann agus a rialaíonn leatsa agus leis an Spiorad Naomh,  
Dia amháin trí shaol na saol.  
Amen.

(Paidir ó shuíomh Ardeaglais Naomh Matha:

[www.cathedralofsaintmatthew.com/LifeResources/Prayers/PrayersForJoy.htm](http://www.cathedralofsaintmatthew.com/LifeResources/Prayers/PrayersForJoy.htm))

## F

### Féach

Fiseán ó ionad teilifíse na Vatacáine (CTV) d'aitheasc An Phápa Proinsias maidir leis an gCríostaí a thuiscint mar dhuine lúcháireach, ó Aifreann i Santa Marta 13 Bealtaine 2013: [www.youtube.com/watch?v=ey6VnQTCQHw](http://www.youtube.com/watch?v=ey6VnQTCQHw)

## L

### Léigh

An Pápa Proinsias, aitheasc aspalda *Amoris Laetitia* (Lúcháir an Ghrá), 57, 65, 73, 86, 88, 110, 115, 126–30, 147–9: [w2.vatican.va/content/dam/francesco/pdf/apost\\_exhortations/documents/papa-francesco\\_esortazione-ap\\_20160319\\_amoris-laetitia\\_en.pdf](http://w2.vatican.va/content/dam/francesco/pdf/apost_exhortations/documents/papa-francesco_esortazione-ap_20160319_amoris-laetitia_en.pdf)

An Pápa Proinsias, imlitir *Laudato Si'* (Aire don Domhan Coiteann), 222–7:

[w2.vatican.va/content/francesco/en/encyclicals/documents/papa-francesco\\_20150524\\_enciclica-laudato-si.pdf](http://w2.vatican.va/content/francesco/en/encyclicals/documents/papa-francesco_20150524_enciclica-laudato-si.pdf)

An Pápa Proinsias, aitheasc aspalda *Evangelii Gaudium* (Lúcháir an tSoiscéil), 1–17:

[w2.vatican.va/content/francesco/en/apost\\_exhortations/documents/papa-francesco\\_esortazione-ap\\_20131124\\_evangelii-gaudium.pdf](http://w2.vatican.va/content/francesco/en/apost_exhortations/documents/papa-francesco_esortazione-ap_20131124_evangelii-gaudium.pdf)

An Pápa Beinidict XVI, imlitir *Deus Caritas Est*, 3, 9, 17:

[w2.vatican.va/content/benedict-xvi/en/encyclicals/documents/hf\\_ben-xvi\\_enc\\_20051225\\_deus-caritas-est.pdf](http://w2.vatican.va/content/benedict-xvi/en/encyclicals/documents/hf_ben-xvi_enc_20051225_deus-caritas-est.pdf)

Eoin Pól II, aitheasc aspalda *Familiaris Consortio*, 52–3, 74, 86:

[w2.vatican.va/content/john-paul-ii/en/apost\\_exhortations/documents/hf\\_jp-ii\\_exh\\_19811122\\_familiaris-consortio.pdf](http://w2.vatican.va/content/john-paul-ii/en/apost_exhortations/documents/hf_jp-ii_exh_19811122_familiaris-consortio.pdf)



## Eolas don Fhoireann

### Réamhrá

Tugann oidí na scoileanna Caitliceacha gach tacaíocht do na tuismitheoirí maidir leis an dualgas atá orthu oideachas sa chreideamh a chur ar na páistí. Ba mhaith leis na múinteoirí go ndéanfaí na daoine óga a oiliúint ar bhealach lán den lúcháir Chríostaí. Deir An Pápa Proinsias linn go bhfásann an lúcháir ionainn de réir mar a bhíonn ár ndóchas i nDia againn. Cuimhníonn Dia ar an gconradh a rinne sé linn, agus sa bhealach seo tuigeann an Críostaí go bhfuil grá ag Dia dó, go bhfuil sé ina fhochair, nach ndearmadann sé riamh é, agus go bhfuil sé ag feitheamh go foighneach air. Is é seo an lúcháir Chríostaí, an bronntanas diaga a eascraíonn ó ghrá Dé. Bíonn na múinteoirí sna scoileanna Caitliceacha ag iarraidh timpeallacht oiriúnach a chruthú ina mbíonn lúcháir an tSoiscéil le sonrú ann, ina mbíonn deis ag cách teagmháil a dhéanamh le grá Dé. Múineann An Pápa Proinsias dúinn go mbíonn an lúcháir agus an t-ionadh á spreagadh ionainn nuair a bhronntar grá agus grásta an Spioraid atá foilsithe ag Dia orainn. Ní thagann an lúcháir Chríostaí chugainn ach amháin trí neart Dé, le cumhacht an Spioraid.

Níl an lúcháir Chríostaí le haimsiú in iarmhais ábhartha. Cuireann a leithéidí bac orainn, agus ar éifeacht na lúcháire. Míníonn An Pápa Proinsias dúinn go dtugann an lúcháir Chríostaí an neart dúinn sinn féin a scaradh ón spleáchas ar iarmhais ábhartha. Bíonn sochaí an tomhaltais go mór le sonrú i ngach gné de shaol an aosa óig, sa lá atá inniu ann. Ba mhaith leis an saol a thabhairt le fios nach féidir a bheith sona gan an comhartha stádais agus an branda is déanaí a bheith ag duine. Bíonn tionchar bréagach, falsa, creachach, ag an dearcadh sin ar an aos óg. Iarrann An Pápa Proinsias orainn dearcadh úr a léiriú, bealach iompair eile a chleachtadh. Cuireann sé i gcuimhne dúinn gur chaith íosa a shaol is a bheatha iomlán ar ár son, agus nuair a céasadh ar an gcros é nach raibh a thuilleadh fágtha aige le bronnadh orainn. Is é sin bronntanas bunaidh ghrá Dé, an bronnadh gan staonadh.

Deir An Pápa Proinsias linn gur seo an saol Críostaí, freastal go croíúil ar a chéile. Tuigimid go maith mar mhúinteoirí nach furasta a leithéid a dhéanamh, ach gur fiú béim a leagadh ar thábhacht ghrásta Dé i saol na mac léinn. Is féidir go líonfaí croithe an phobail scoile leis an lúcháir údarach Chríostaí ar an mbealach sin. Tugann An Pápa Proinsias le fios dúinn gur féidir linn meastachán a dhéanamh ar éifeacht na hoibre a bhíonn idir lámha againn maidir le lúcháir an tSoiscéil a scaipeadh, de réir an mhéid aghaidheanna dóchasacha gealgháireacha agus súile lán de lúcháir a bhíonn le sonrú mórthimpeall orainn. Is é seo an chuid dheireanach d'obair Sheachtain na Scoileanna Caitliceacha 2018, agus ba mhaith an rud é go ndéanfadh na múinteoirí machnamh faoi choincheap na lúcháire Chríostaí, agus é a phlé lena chéile. Ba mhaith an rud é chomh maith go mbeadh tuiscint acu maidir leis an dualgas atá orthu an lúcháir Chríostaí a chur chun cinn ina gcuid oibre i measc phobal na scoileanna Caitliceacha.





### Machnamh

- 'Ní fhaca sibh é, ach tugann sibh grá dó; ní fheiceann sibh anois féin é, ach creideann sibh ann, agus is lúcháireach sibh le háthas glórmhar dolabhartha, agus slánú bhur n-anam á ghnóthú agaibh mar thoradh ar bhur gcreideamh.' (1 Pead 1:8–9)
- 'Go ndéana Dia an dóchais sibh a líonadh den áthas agus den tsíocháin uile sa chreideamh ar shlí go mbeidh raidhse den dóchas agaibh trí chumhacht an Spioraid Naoimh.' (Rómh 15:13)
- Baineann na tagairtí scríoptúrtha thuas leis an lúcháir Chríostaí. Scríobh nótaí dialainne le haghaidh lá áirithe na seachtaine. Déan cur síos ar na bealaí inar léirigh tú an lúcháir ar scoil, agus an tionchar a bhí acu ar na daltaí nó ar fhoireann na scoile. Nuair a bhíonn an iontráil scríofa agat, déan machnamh faoi bhrí na lúcháire Chríostaí, agus faoin fhreagracht atá ort féin é a chur i bhfeidhm mar oideachasóir Caitliceach. An bhféadfá feabhas a chur leis an lúcháir Chríostaí a léiríonn tú i rith imeachtaí an lae?
- Breathnaigh ar an bhfíseán. Aitheasc An Phápa Proinsias, Aifreann na maidine 31 Bealtaine 2013) [www.youtube.com/watch?v=rFY5ugSCz-A](http://www.youtube.com/watch?v=rFY5ugSCz-A). Pléigh aitheasc An Phápa Proinsias maidir le tábhacht na lúcháire, le baill fhoirne eile. An féidir libh dhá bhealach a lua le lúcháir an tsaoil scoile a chothú i measc phobal na scoile?

## Paidir

### Guí Leis an Lúcháir a Scaipeadh

A Athair, is tusa foinse na beatha, tuigeann tú go maith sinn.  
Sín chugainn an lámh chúnata,  
agus lig dúinn an t-aistear a chur dinn in éineacht leatsa, de réir do thola.

Iarraimid é seo ort trí do Mhac, Íosa Críost ár dTiarna,  
a mhaireann agus a rialaíonn leatsa agus leis an Spiorad Naomh,  
aon Dia amháin trí shaol na saol.

Amen.

(*Paidir ó shuíomh Ardeaglais Naomh Matha:*

[www.cathedralofsaintmatthew.com/LifeResources/Prayers/PrayersForJoy.htm](http://www.cathedralofsaintmatthew.com/LifeResources/Prayers/PrayersForJoy.htm))